

**MALAYSIA**  
**DEWAN RAKYAT**  
**ATURAN URUSAN MESYUARAT**

**NASKHAH SAHIH/BAHASA MALAYSIA**

<http://www.parlimen.gov.my>

**HARI RABU, 6 APRIL 2016, PUKUL 10.00 PAGI**

**Bil. 19**

---

**PERTANYAAN-PERTANYAAN BAGI JAWAB LISAN**

1. PR-1341-L71716  
**Dato' Haji Abdul Rahman bin Haji Mohamad [ Lipis ]** minta **MENTERI KOMUNIKASI DAN MULTIMEDIA** menyatakan langkah-langkah Kementerian bagi mengawal harga syarikat penyiaran ASTRO yang dilihat seolah-olah tiada kawalan sehingga membebaskan pengguna.
2. PR-1341-L73439  
**Dato' Haji Mahfuz bin Omar [ Pokok Sena ]** minta **MENTERI PERTANIAN DAN INDUSTRI ASAS TANI** menyatakan :-
  - (a) apakah bentuk kawalan kemasukan beras luar apabila perlaksanaan TPPA; dan
  - (b) apakah jaminan dan langkah perlindungan kepada industri padi dan kepada petani padi dalam berdepan dengan TPPA.
3. PR-1341-L72247  
**Tan Sri Datuk Seri Panglima Annuar bin Musa [ Ketereh ]** minta **MENTERI BELIA DAN SUKAN** menyatakan keberhasilan kerjasama IKBN dengan pemaju industri khususnya dalam sektor automobil dan perkhidmatan bagi meningkatkan potensi peluang pekerjaan graduan IKBN dalam pasaran tempatan dan antarabangsa.
4. PR-1341-L72027  
**Puan Hajah Fuziah binti Salleh [ Kuantan ]** minta **MENTERI PELANCONGAN DAN KEBUDAYAAN** menyatakan perancangan pihak Kementerian untuk membantu industri pelancongan serta mengembalikan pelancong ke Kuantan setelah kawasan sekitar terjejas teruk akibat pencemaran perlombongan bauksit.
5. PR-1341-L71625  
**Dato' Haji Mohd Zaim bin Abu Hasan [ Parit ]** minta **MENTERI DALAM NEGERI** menyatakan statistik jenayah siber yang melibatkan keganasan dan ekstremisme yang ada hubung kait dengan kumpulan DAESH dan Al-Qaeda semenjak lima tahun yang lepas.

6. PR-1341-L72497  
**Dr. Ong Kian Ming [ Serdang ]** minta **MENTERI PENDIDIKAN TINGGI** menyatakan status terkini pembinaan hospital kanak-kanak UKM dan memberi penjelasan mengapa pembinaan projek ini telah terhenti.
7. PR-1341-L71918  
**Datuk Dr. Haji Abd. Latiff bin Haji Ahmad [ Mersing ]** minta **MENTERI KEMAJUAN LUAR BANDAR DAN WILAYAH** menyatakan berapa banyak kampung yang telah dipilih dan berjaya di bawah Program Desa Lestari sejak diperkenalkan. Apakah sumbangan dan tindakan Kementerian di dalam usaha untuk lebih banyak kampung-kampung menyertai program ini bagi menjana kegiatan ekonomi penduduk.
8. PR-1341-L73368  
**Dato' Dr. Nik Mazlan bin Nik Mohamad [ Pasir Puteh ]** minta **MENTERI PEMBANGUNAN WANITA, KELUARGA DAN MASYARAKAT** menyatakan apakah usaha Kementerian untuk membantu membina kehidupan golongan gelandangan dalam penyediaan tempat tinggal dan sara hidup harian.
9. PR-1341-L71766  
**Datuk Wee Jeck Seng [ Tanjong Piai ]** minta **MENTERI PENDIDIKAN** menyatakan bagaimanakah berkesan usaha masa lalu, seperti Projek Pendidikan Guru, dalam menangani kes buli sekolah dan membendung budaya gangsterisme atau samseng di sekolah.
10. PR-1341-L71895  
**Tuan Abdullah Sani bin Abdul Hamid [ Kuala Langat ]** minta **MENTERI PENDIDIKAN** menyatakan tindakan terhadap kes Sekolah Menengah Bandar Sungai Buloh yang berkaitan dengan penipuan Syarikat Space Tourism Society-Malaysia Chapter terhadap projek mereka cipta kapal terbang angkasa yang dijanjikan hadiah kemenangan dari tahun 2011.
11. PR-1341-L72265  
**Dato' Hasbullah bin Osman [ Gerik ]** minta **MENTERI PENDIDIKAN TINGGI** menyatakan langkah-langkah pihak Kementerian dalam memberikan perhatian terhadap kebajikan pelajar-pelajar di Institut pengajian tinggi agar kebajikan pelajar akan terus terjamin.
12. PR-1341-L72357  
**Dr. Hajah Siti Mariah binti Mahmud [ Kota Raja ]** minta **MENTERI PENDIDIKAN** menyatakan apakah perancangan Kementerian untuk menggalakkan guru-guru untuk berkhidmat di sekolah-sekolah luar bandar dan pedalaman.
13. PR-1341-L73126  
**Dato' Abdul Manan bin Ismail [ Paya Besar ]** minta **MENTERI KESIHATAN** menyatakan dakwaan Persatuan Perubatan Malaysia (MMA) bahawa graduan perubatan berdepan kesukaran mendapat tempat sebagai doktor pelatih di hospital Kerajaan andainya pengambilan pelajar dalam bidang perubatan tidak dikurangkan dari 5,000 kepada 3,000 orang.

14. PR-1341-L72466  
**Ust. Datuk Dr. Mohd. Khairuddin bin Aman Razali [ Kuala Nerus ]** minta **MENTERI KERJA RAYA** menyatakan mekanisme mengaudit jalan-jalan raya yang baru siap dibina atau masih dalam proses pembinaan bagi memastikan ia menepati standard dan spesifikasi yang telah ditentukan.
15. PR-1341-L73000  
**Puan Rubiah binti Haji Wang [ Kota Samarahan ]** minta **MENTERI PENDIDIKAN** menyatakan apakah status penempatan 90 peratus anak Sarawak sebagai guru di negeri Sarawak seperti dirancang oleh Kementerian dan adakah elaun diperoleh mereka sama seperti guru Semenanjung yang ditempatkan di Sarawak.
16. PR-1341-L72102  
**Tuan Zairil Khir Johari [ Bukit Bendera ]** minta **MENTERI PENDIDIKAN** menyatakan kenapa Program Penutur Jati Bahasa Inggeris (PPJBI) diberhentikan setelah lebih RM500 juta dibelanja, sedangkan Kementerian sendiri mendakwa terdapat keberkesanan yang ketara.
17. PR-1341-L73541  
**Datuk Dr. Ewon Ebin [ Ranau ]** minta **MENTERI PENDIDIKAN** menyatakan susulan daripada perisytiharan bahawa bangunan Sekolah Menengah Kundasang tidak selamat untuk diduduki pada bulan Oktober 2012, bilakah kerja-kerja pembinaan bangunan baru SMK Kundasang dimulakan, yang mana ia akan dibina, bila dijangka siap dan jumlah kos yang terlibat.
18. PR-1341-L72138  
**Tuan Su Keong Siong [ Ipoh Timor ]** minta **MENTERI KOMUNIKASI DAN MULTIMEDIA** menyatakan rancangan dan langkah-langkah yang sedang diambil untuk mengatasi masalah kekurangan dan langkah-langkah yang sedang diambil untuk mengatasi masalah kekurangan kelajuan broadband di Malaysia jika di bandingkan dengan negara-negara jiran di Asia Tenggara. Adakah Kerajaan berhasrat membuka "*High Speed Broadband (HSBB) infrastructure provider*" kepada syarikat lain untuk beroperasi di Malaysia, jika tidak, kenapa.
19. PR-1341-L73337  
**Dato' Othman bin Aziz [ Jerlun ]** minta **MENTERI KOMUNIKASI DAN MULTIMEDIA** menyatakan penambahbaikan Program Kampung Tanpa Wayar bagi memantapkan jaringan jalur lebar tanpa wayar percuma di kawasan luar bandar khususnya di Kedah dan apakah kekangan yang telah dikenalpasti bagi menjayakan insentif RMK-11 ini.
20. PR-1341-L72435  
**Tuan Chong Chieng Jen [ Bandar Kuching ]** minta **MENTERI PELANCONGAN DAN KEBUDAYAAN** menyatakan berapakah pelancong yang melawat Sarawak dalam tahun 2015 dan apakah angka pendapatan yang dihasilkan daripada lawatan mereka. Bagaimana angka-angka ini berbanding dengan pelancongan Sabah. Apakah angka berkenaan untuk tahun 2016.

21. PR-1341-L71745  
**Datuk Zahidi bin Zainul Abidin [ Padang Besar ]** minta **MENTERI PELANCONGAN DAN KEBUDAYAAN** menyatakan :-
- (a) setakat mana kesan kejayaan Pelancongan Patuh Syariah Malaysia dalam konteks Tahun Melawat Malaysia 2015 yang lalu ; dan
  - (b) apakah dasar dan langkah-langkah promosi keluar negara dan insentif untuk meningkatkan pencapaian perniagaan dan pendapatan para pengusaha Pelancongan Patuh Syariah, khususnya perkhidmatan Homestay (Inap Desa) dan Produk Pelancongan Desa yang lain.
22. PR-1341-L73161  
**Tuan Ahmad Baihaki bin Atiqullah [ Kubang Kerian ]** minta **PERDANA MENTERI** menyatakan setelah lebih setahun bencana banjir besar melanda negeri Kelantan dan menyaksikan banyak kemusnahan harta benda termasuk rumah kediaman, berapa buah rumah yang telah siap dibina oleh Kerajaan Persekutuan dan telah diserahkan kepada mangsa untuk diduduki.
23. PR-1341-L72976  
**Dato' Ir. Haji Nawawi bin Ahmad [ Langkawi ]** minta **MENTERI KESIHATAN** menyatakan langkah-langkah pengawasan serta tindakan yang diambil oleh pihak Kementerian dalam menghalang wabak penyakit seperti demam kepialu atau yang terbaru wabak zika yang disebabkan oleh pekerja asing.
24. PR-1341-L72453  
**Puan Siti Zailah binti Mohd Yusoff [ Rantau Panjang ]** minta **PERDANA MENTERI** menyatakan isu penarikan bantuan biasiswa JPA dan MARA dan apakah perancangan jangka pendek dan jangka panjang.
25. PR-1341-L71845  
**Datuk Aaron Ago anak Dagang [ Kanowit ]** minta **MENTERI PERTANIAN DAN INDUSTRI ASAS TANI** menyatakan pencapaian terkini berkaitan Program Agropreneur Muda yang telah dijalankan oleh pihak Kementerian dalam memimpin dan mendidik anak muda berkaitan perniagaan berasaskan hasil pertanian.
26. PR-1341-L73485  
**Dato' Kamarudin bin Jaffar [ Tumpat ]** minta **MENTERI PENGANGKUTAN** menyatakan apakah perkembangan terkini usaha mencari pesawat MH370.
27. PR-1341-L73361  
**Dato' Ar. Wan Mohammad Khair-il Anuar bin Wan Ahmad [ Kuala Kangsar ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan adakah benar sama ada harga minyak RON95 dan diesel yang dinikmati oleh rakyat adalah tidak sama dengan harga yang diberi kepada pihak industri. Jika benar, berapakah perbezaan harganya.

28. PR-1341-L73525  
**Dato' Seri Mohamed Azmin bin Ali [ Gombak ]** minta **MENTERI KEWANGAN** menyatakan apakah pelan strategi Kerajaan bagi menjana sumber pendapatan baru berikutan kebergantungan terbesar pendapatan negara masih terhadap industri petroleum.
29. PR-1341-L72373  
**Datuk Juslie bin Ajirol [ Libaran ]** minta **MENTERI DALAM NEGERI** menyatakan usaha serius Kementerian dalam menangani aktiviti perjudian dalam talian yang semakin berleluasa di negara ini.
30. PR-1341-L72876  
**Tuan Sim Tze Tzin [ Bayan Baru ]** minta **MENTERI PENGANGKUTAN** menyatakan sama ada Kerajaan telah melaksanakan sistem demerit KEJARA. Berapakah pemandu telah digantung lesen sejak perlaksanaan mengikut tahun.
31. PR-1341-L72890  
**Datuk Hajah Norah binti Abd Rahman [ Tanjong Manis ]** minta **PERDANA MENTERI** menyatakan langkah-langkah dan jangka masa yang akan diambil oleh Majlis Halal Malaysia untuk menggerakkan pensijilan halal Malaysia ke persada antarabangsa dan apakah badan dan agensi lain yang akan digabungkan di bawah Majlis Halal Malaysia, selain dari JAKIM dan HDC.
32. PR-1341-L72559  
**Tuan Manivanan a/l Gowindasamy [ Kapar ]** minta **MENTERI SUMBER MANUSIA** menyatakan :-
- (a) sama ada gaji minimum bakal dipantau memandangkan kos hidup semakin melambung tinggi, malahan rakyat disaran oleh Timbalan Menteri Perdagangan Antarabangsa dan Industri agar mendapatkan kerja sampingan sebagai langkah menambah pendapatan; dan
  - (b) sama ada terdapat apa-apa usaha untuk menggalakkan warganegara Malaysia bekerja dalam bidang-bidang yang tidak digemari seperti bidang pembinaan, supaya mengurangkan penggunaan buruh asing. Apakah terdapat sebarang kaji selidik dilakukan untuk mengetahui mengapa warganegara Malaysia tidak mengemari bidang-bidang tersebut, dan sekiranya ada, senaraikan faktor-faktor yang menyebabkan mereka tidak mengemari bidang tersebut.
33. PR-1341-L71952  
**Dr. Mansor bin Abd Rahman [ Sik ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan mengapakah terdapat harga makanan atau minuman di kebanyakan restoran-restoran atau kedai-kedai makan didapati tidak seragam dan terdapat yang mengenakan harga yang sangat tidak berpatutan. Adakah pihak Kementerian mempunyai satu mekanisma khusus bagi memastikan harga yang dikenakan tidak membebbankan pengguna.

34. PR-1341-L71676  
**Dr. Che Rosli bin Che Mat [ Hulu Langat ]** minta **MENTERI KEWANGAN** menyatakan masalah yang dihadapi Kementerian dalam membayar balik GST kepada syarikat-syarikat sebagaimana yang dijanjikan. Adakah jumlah kutipan GST yang diisytiharkan termasuk jumlah yang perlu dibayar balik kepada syarikat berkenaan.
35. PR-1341-L72922  
**Tuan Lim Lip Eng [ Segambut ]** minta **PERDANA MENTERI** menyatakan status janji Kerajaan untuk menurunkan harga kereta kebangsaan dan mengurangkan kadar tol yang dibuat pada Pilihan Raya Umum ke-13 lalu.
36. PR-1341-L72051  
**Dato' Noraini binti Ahmad [ Parit Sulong ]** minta **MENTERI KERJA RAYA** menyatakan status pembinaan Jambatan ke 2 Batu Pahat (*bypass*) sebagai jalan alternatif bagi mengurangkan kesesakan di jambatan sedia ada menuju ke arah Bandar Batu Pahat dari arah Muar.
37. PR-1341-L73281  
**Dato' Hasan bin Arifin [ Rompin ]** minta **MENTERI PENDIDIKAN** menyatakan jumlah terkini kuarters institusi pendidikan berdasarkan negeri, jumlah yang berpenghuni sepenuhnya, jumlah yang berpenghuni tidak sepenuhnya dan jumlah kuarters yang tidak berpenghuni serta apakah inisiatif Kementerian bagi mengatasi masalah ini.
38. PR-1341-L71905  
**Tuan Anuar bin Abd. Manap [ Sekijang ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan keadaan semasa kestabilan pelaksanaan GST terhadap harga barang serta adakah sasaran tempoh masa 1 tahun yang perlu diambil bagi memastikan harga barangan menjadi stabil selepas pelaksanaan GST akan dapat dicapai.
39. PR-1341-L72660  
**Tuan Gobind Singh Deo [ Puchong ]** minta **PERDANA MENTERI** menyatakan skim gaji dan faedah-faedah pekerjaan Timbalan Pendakwa Raya dan menyatakan sama ada Kerajaan sedia menyemak dan menambahbaik skim gaji dan faedah-faedah pekerjaan Timbalan Pendakwa Raya dan sekiranya ya, apakah langkah-langkah yang akan diambil.
40. PR-1341-L71701  
**Dato' Kamarul Baharin bin Abbas [ Telok Kemang ]** minta **PERDANA MENTERI** menyatakan :-
- (a) peratus pemilikan saham FGV yang berjumlah RM 360 juta oleh peneroka FELDA berbanding jumlah keseluruhan saham tersebut; dan
  - (b) berapa ramai peneroka yang masih mempunyai tunggakan pinjaman akibat daripada pembelian saham tersebut.

41. PR-1341-L71715  
**Laksamana Pertama Mohamad Imran bin Abd Hamid (B) [ Lumut ]** minta **MENTERI PERTANIAN DAN INDUSTRI ASAS TANI** menyatakan menyatakan dan tindakan yang telah diambil ke atas laporan Jawatankuasa Kira-Kira Wang Negara (PAC) (DR 11 Tahun 2015) mengenai Projek Pembangunan Empangan Paya Peda Besut Terengganu.
42. PR-1341-L72407  
**Tuan Liew Chin Tong [ Kluang ]** minta **PERDANA MENTERI** menyatakan pencerobohan kapal warga asing di kawasan EEZ Laut China Selatan dari 2010 hingga 2016:-
- (a) berapa kalikah jumlah penghalauan dan penangkapan dijalankan oleh Agensi Penguatkuasa Maritim Malaysia; dan
  - (b) pecahan pencerobohan mengikut negara, jenis kapal dan kekerapan.
43. PR-1341-L71937  
**Dato' Mansor bin Othman [ Nibong Tebal ]** minta **PERDANA MENTERI** menyatakan rasional kenapa YAPEIM (Yayasan Ekonomi Islam Malaysia) perlu melibatkan diri dengan tugas melaksanakan kursus-kursus perkahwinan terutamanya di luar negara. Adakah tindakan ini sudah tersasar dengan peranan utama YAPEIM.
44. PR-1341-L72483  
**Puan Hajah Normala binti Abdul Samad [ Pasir Gudang ]** minta **PERDANA MENTERI** menyatakan apakah tindakan yang diambil oleh Kerajaan bagi menangani masalah Lesbian, Gay, Bisexual and Transexual (LGBT) daripada terus menular dikalangan Masyarakat Islam di Malaysia.
45. PR-1341-L72900  
**Tuan Sim Chee Keong [ Bukit Mertajam ]** minta **MENTERI DALAM NEGERI** menyatakan maklumat lanjut tentang perjanjian G2G dengan Kerajaan Bangladesh bagi kemasukan 1.5 juta pekerja ke Malaysia termasuk kos dan sebarang bayaran yang akan dikenakan, syarikat yang terlibat sebagai sistem *provider*, bayaran kepada syarikat tersebut dan sebagainya.
46. PR-1341-L72525  
**Tuan Ramkarpal Singh a/l Karpal Singh [ Bukit Gelugor ]** minta **MENTERI PENGANGKUTAN** menyatakan apakah sebab pencarian MH370 akan berakhir dalam bulan Jun 2016 dan sama ada MH370 tersebut akan dianggap sebagai terhempas dan kesemua penumpang maut selepas tarikh tersebut.
47. PR-1341-L72192  
**Puan Hajah Zuraida binti Kamaruddin [ Ampang ]** minta **MENTERI KEWANGAN** menyatakan menjelaskan siapa di SRC International yang mengarahkan pemindahan wang sebanyak RM42 juta ke dalam akaun Perdana Menteri.
48. PR-1341-L71613  
**Datuk Sapawi bin Ahmad Wasali [ Sipitang ]** minta **MENTERI PENDIDIKAN** menyatakan jumlah sekolah-sekolah daif di Sabah dan Sarawak yang dikenal pasti untuk diganti atau dinaik taraf pada tahun ini.

49. PR-1341-L73024

**Tuan Wong Sze Phin @ Jimmy [ Kota Kinabalu ]** minta **PERDANA MENTERI** menyatakan apakah proses peralihan daripada Jawatankuasa Kabinet Bagi Hak Tanah Adat kepada penubuhan sebuah Suruhanjaya mengenai Orang Asal. Apakah pertimbangan terhadap syor supaya proses peralihan tersebut diteliti oleh *Parliamentary Select Committee on Indigenous Peoples* oleh Jaringan Orang Asal SeMalaysia (JOAS).

50. PR-1341-L73521

**Datuk Koh Nai Kwong [ Alor Gajah ]** minta **MENTERI DALAM NEGERI** menyatakan sama ada Kerajaan akan menaikkan kompaun kesalahan lalu lintas untuk mengurangkan kemalangan maut atau pun apakah tindakan dan usaha lain yang Kerajaan akan ambil untuk mengurangkan kemalangan maut ke tahap yang paling rendah.

51. PR-1341-L72003

**Datuk Joseph Salang anak Gandum [ Julau ]** minta **PERDANA MENTERI** menyatakan langkah-langkah untuk mencapai atau merealisasikan cita-cita mewujudkan kawasan BIMP-EAGA yangmana Malaysia dianggap sebagai negara yang terpenting.

52. PR-1341-L71807

**Datuk Jumat bin Idris [ Sepanggar ]** minta **MENTERI KESIHATAN** menyatakan :-

- (a) apakah pendirian kementerian terhadap penggunaan *vape* atau rokok elektronik dikalangan rakyat Malaysia; dan
- (b) adakah pihak kementerian sudah menjalankan kajian menyeluruh mengenai sama ada bahaya atau tidak penggunaan *vape* ataupun rokok elektronik ini dan apakah hasilnya.

53. PR-1341-L72374

**Dato' Mohd Ariff Sabri bin Abdul Aziz [ Raub ]** minta **MENTERI DALAM NEGERI** menyatakan :-

- (a) sehingga 7 Mac 2016, berapa ramaikah rakyat Bangladesh telah dibawa masuk secara sah ke dalam negara kita; dan
- (b) agensi dan syarikat mana yang dikontrakkan untuk membawa masuk 1.5 juta pekerja Bangladesh tersebut.



54. PR-1341-L72986

**Dato' Seri Tiong King Sing [ Bintulu ]** minta **MENTERI PERTANIAN DAN INDUSTRI ASAS TANI** menyatakan :-

- (a) adakah pihak Kementerian berhasrat untuk melaksana serta memperluaskan zon penangkapan ikan bagi penduduk-penduduk Kampung Kuala Nyalau yang mana mereka ini tidak dibenarkan menjalankan aktiviti-aktiviti menangkap ikan yang melibatkan kawasan Pelantar Minyak 20 Batu N.U milik Petronas Cari Gali dan kawasan Bintulu Port Holding Sdn Bhd (Laut Samalaju) yang mana ia telah diwartakan sebagai zon larangan; dan
- (b) berapakah kos yang melibatkan Projek Pembinaan Tukun Tiruan jika pihak Kementerian mempunyai cadangan untuk menempatkan kawasan penangkapan ikan.

55. PR-1341-L72834

**Puan Teo Nie Ching [ Kulai ]** minta **MENTERI DALAM NEGERI** menyatakan jumlah laporan, kes yang didakwa, dan kes yang dijatuh hukum untuk jenayah seperti keganasan rumahtangga, rogol, *incest*, penderaan kanak-kanak, *outrage of modesty*, dan gangguan seksual di tempat kerja sejak 2008 sehingga terkini.

56. PR-1341-L73478

**Tuan Haji Ahmad Nazlan bin Idris [ Jerantut ]** minta **MENTERI PERUSAHAAN PERLADANGAN DAN KOMODITI** menyatakan apakah usaha Kementerian untuk menggalakkan petani meningkatkan usaha penanaman koko di Malaysia.

57. PR-1341-L72598

**Tuan Chua Tian Chang @ Tian Chua [ Batu ]** minta **MENTERI DALAM NEGERI** menyatakan adakah pindaan Akta Hasutan yang telah diwartakan pada tahun 2015 belum lagi dikuatkuasakan.

58. PR-1341-L71786

**Datuk Haji Datu Nasrun bin Datu Mansur [ Silam ]** minta **MENTERI PELANCONGAN DAN KEBUDAYAAN** menyatakan apakah langkah yang diambil oleh Kementerian dalam menaiktaraf kawasan pelancongan di pantai timur Sabah memandangkan kawasan ini mempunyai banyak pulau dan hutan simpan seperti Lembah Danum dan Tabin yang sering menjadi tumpuan pelancong luar negara.

59. PR-1341-L73055

**Dato' Shamsul Anuar bin Haji Nasarah [ Lenggong ]** minta **MENTERI PERDAGANGAN ANTARABANGSA DAN INDUSTRI** menyatakan program dan bantuan pendidikan yang diberikan kepada pengusaha muda/kecil dan sederhana supaya lebih produktif, proaktif dan berdaya saing untuk memasarkan produk mereka ke persada antarabangsa seiringan konsep pasaran terbuka pada masa akan datang.

60. PR-1341-L73139  
**Datuk Liang Teck Meng [ Simpang Renggam ]** minta **MENTERI DALAM NEGERI** menyatakan berapakah jumlah mangsa yang diselamatkan di bawah Akta Perdagangan Orang dan Anti Penyeludupan Migran (ATIPSOM) 2007 di Labuan sejak 2007 dan apakah tahap penguatkuasaan dilakukan oleh Kementerian dalam membanteras aktiviti tidak bermoral.
61. PR-1341-L72086  
**Raja Dato' Kamarul Bahrin Shah [ Kuala Terengganu ]** minta **MENTERI KEWANGAN** menyatakan apakah tindakan pihak berkuasa atas syarikat dan anak-anak Syarikat 1MDB yang menjalankan urusan niaga kewangan tanpa mengikut garis panduan syariah yang ditetapkan (*Syariah Compliance*).
62. PR-1341-L73413  
**Tuan Haji Khalid bin Abdul Samad [ Shah Alam ]** minta **PERDANA MENTERI** menyatakan pendiriannya terhadap cadangan pindaan Akta Rahsia Rasmi (OSA) oleh Peguam Negara berhubung hukuman rotan dan penjara seumur hidup.
63. PR-1341-L73622  
**Tuan Haji Ahmad Lai bin Bujang [ Sibuti ]** minta **MENTERI KESIHATAN** menyatakan adakah Kementerian bercadang untuk memberi subsidi kepada ubat-ubatan "*Line 2*" dan "*Line 3*" kepada pesakit HIV positif yang mana pesakit perlu membayar dengan harga yang tinggi.

\*\*\*\*\*

**PADA PERMULAAN URUSAN MESYUARAT**  
**MENGEMUKAKAN RANG UNDANG-UNDANG KERAJAAN**  
**UNTUK BACAAN KALI YANG PERTAMA**

1. **Menteri Dalam Negeri**

- \* Rang Undang-Undang Agensi Antidadah Kebangsaan (Pindaan) 2016.

2. **Menteri di Jabatan Perdana Menteri**

- \* Rang Undang-Undang Ordinan Peguam Bela (Sabah) (Pindaan) 2016

3. **Menteri Pengangkutan**

- \* Rang Undang-Undang Ordinan Perkapalan Saudagar (Pindaan) 2016

---

\* Menandakan bahawa Rang Undang-undang ini akan dibawa pada semua peringkat di mesyuarat ini.

**ATURAN URUSAN MESYUARAT DAN USUL-USUL**

- |    |                |  |                                   |
|----|----------------|--|-----------------------------------|
| 1. | (D.R. 37/2015) | Rang Undang-undang Profesion<br>Undang-undang (Pindaan) 2015 | <b>Bacaan Kali<br/>Yang Kedua</b> |
|----|----------------|--|-----------------------------------|

**[Menteri di Jabatan Perdana Menteri]**

- |    |                |  |   |
|----|----------------|--|---|
| 2. | (D.R. 39/2015) | Rang Undang-undang Kanak-Kanak<br>(Pindaan) 2015 | “ |
|----|----------------|--|---|

**[Menteri Pembangunan Wanita,  
Keluarga dan Masyarakat]**

- |    |                |  |   |
|----|----------------|--|---|
| 3. | (D.R. 3/2016 ) | Rang Undang-undang Institut<br>Penyelidikan Perhutanan Malaysia 2016 | “ |
|----|----------------|--|---|

**[Menteri Sumber Asli dan Alam  
Sekitar]**

4. **Menteri Kewangan akan mencadangkan :**

“Bahawa Dewan ini, mengikut peruntukan :-

- (i) perenggan 4(b) Akta Pendanaan Kerajaan 1983 [Akta 275], mengambil ketetapan supaya Kerajaan memindahkan sebanyak RM28,000 juta wang terimaan Terbitan Pelaburan Kerajaan (TPK) di bawah seksyen 3(1) Akta yang sama; dan
- (ii) perenggan 2(b) Akta Bil Perbendaharaan (Tempatan) 1946 [Akta 188], mengambil ketetapan supaya Kerajaan memindahkan sebanyak RM385.6 juta wang terimaan Bil Perbendaharaan Malaysia (BPM) yang diterima di bawah seksyen 2(1) Akta yang sama

ke Kumpulan Wang Pembangunan yang dinyatakan dalam Jadual Kedua Akta Tatacara Kewangan 1957 [Akta 61] bagi maksud Kumpulan Wang tersebut “.

5. **Menteri Kewangan akan mencadangkan :**

“Bahawa Majlis ini mengambil ketetapan iaitu menurut kuasa yang diletakkan padanya oleh subseksyen (2) seksyen 11 Akta Kastam 1967 supaya Perintah Duti Kastam yang dibentangkan di hadapan Majlis ini sebagai kertas statut bil. ST.16, ST.17, ST.18, ST.26, ST.27, ST.29 dan ST.30 bagi tahun 2016 disahkan”.

6. **Menteri Kewangan akan mencadangkan :**

“Bahawa Majlis ini mengambil ketetapan iaitu menurut kuasa yang diletakkan padanya oleh subseksyen (2) seksyen 6 Akta Eksais 1976 supaya Perintah Duti Eksais (Pindaan) 2016 yang dibentangkan di hadapan Majlis ini sebagai kertas statut bil. ST.31 tahun 2016 disahkan”.

7. **Menteri Kewangan akan mencadangkan :**

“Bahawa Majlis ini mengambil ketetapan iaitu menurut kuasa yang diletakkan padanya oleh subseksyen (2) seksyen 56, Subseksyen (5) seksyen 17 dan subseksyen (3) seksyen 18, Akta Cukai Barang dan Perkhidmatan 2014 supaya Perintah Cukai Barang dan Perkhidmatan yang dibentangkan di hadapan Majlis ini sebagai kertas statut bil. ST.11, ST.12 dan ST.13 bagi tahun 2016 disahkan”.

8. **Menteri Pelancongan dan Kebudayaan akan mencadangkan :**

“Bahawa mengikut Peraturan Mesyuarat 86(5), maka Penyata Jawatankuasa Peraturan-Peraturan Mesyuarat dibentangkan di atas meja Mesyuarat di dalam Dewan ini sebagai Kertas Dewan Rakyat DR.2 Tahun 2016 hendaklah diterima dan dipersetujukan.

- |     |               |  |                               |
|-----|---------------|--|-------------------------------|
| 9.  | (D.R.9/2015)  | Rang Undang-undang Kanun Tatacara Jenayah (Pindaan) 2015             | <b>Bacaan Kali Yang Kedua</b> |
|     |               | <b>[Menteri di Jabatan Perdana Menteri]</b>                          |                               |
| 10. | (D.R.12/2015) | Rang Undang-undang Keterangan (Pindaan) 2015                         | “                             |
|     |               | <b>[Menteri di Jabatan Perdana Menteri]</b>                          |                               |
| 11. | (D.R.1/2016)  | Rang Undang-undang Bekalan Gas (Pindaan) 2016                        | “                             |
|     |               | <b>[Menteri di Jabatan Perdana Menteri]</b>                          |                               |
| 12. | (D.R.35/2015) | Rang Undang-undang Persaingan (Pindaan) 2015                         | “                             |
|     |               | <b>[Menteri Perdagangan Dalam Negeri, Koperasi dan Kepenggunaan]</b> |                               |

13. PR-1341-U72985

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa pembangunan infrastruktur di negeri Sabah masih jauh ketinggalan berbanding dengan negeri-negeri lain di Malaysia. Dan mengambil maklum juga bahawa negeri Sabah memerlukan lebih banyak dana demi untuk membangunkan kemudahan infrastruktur sekali di kawasan luar bandar serta keperluan-keperluan lain seperti masalah tebatan banjir, projek perumahan rakyat termiskin dan lain-lain. Dan mengambil maklum juga bahawa rakyat negeri Sabah juga beraspirasi seperti rakyat negeri Sarawak, sepertimana yang dinyatakan oleh YAB Tan Sri Adenan Satem (Ketua Menteri Sarawak) ingin memohon agar royalti minyak dapat dinaikkan kepada kadar 20%. Dan mengambil maklum juga, sekiranya royalti minyak dinaikkan pada kadar 20%, maka dengan lebih dana tersebut, kerajaan negeri Sabah akan dapat melaksanakan keperluan-keperluan di atas dengan lebih baik dan cepat lagi. Maka, bagi meredakan rungutan dan tuntutan rakyat negeri Sabah, maka Dewan yang mulia ini hendaklah mengambil ketetapan bahawa Kerajaan Malaysia menaikkan kadar royalti minyak bagi negeri Sabah kepada kadar 20% dan sekaligus membolehkan negeri Sabah membangun dengan lebih pesat lagi."

**[ Perdana Menteri ]**

14. PR-1341-U73002

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa kesesakan Jalan Putatan merupakan rungutan hampir setiap pengguna jalan tersebut. Dan mengambil maklum juga bahawa Jalan Putatan merupakan sebahagian daripada rangkaian Jalan Pan Borneo Highway yang mana sepatutnya mendapat perhatian utama dan bebas kesesakan. Dan mengambil maklum juga, bahawa kesesakan Jalan Putatan juga disebabkan rekabentuk yang kurang baik di mana terdapat terlalu banyak U-Turn dan simpang, yang menjadi penyebab utama kelancaran aliran trafik selain menjadi punca kemalangan. Dan mengambil maklum juga, bahawa kesesakan Jalan Putatan dapat diatasi dengan membina sebatang Jalan Pantai (Coastal Highway) alternatif yang menghubungkan pekan Tanjung Aru dengan Pekan Kinarut. Dan mengambil maklum juga bahawa, sekiranya jalan pantai alternatif yang dimaksudkan dibina, ianya juga boleh membantu untuk mengelakkan hakisan pantai di sepanjang laluan tersebut. Dan mengambil maklum juga bahawa, untuk membina jalan baru sebagai laluan alternatif bagi Jalan Putatan akan menelan belanja yang besar terutama sekali bagi tujuan pampasan tanah yang dilalui. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah membina jalan pantai alternatif bagi Jalan Putatan demi untuk keselesaan rakyat yang menggunakan laluan tersebut."

**[ Menteri Kerja Raya ]**

15. PR-1341-U73023

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa keengganan Kerajaan Persekutuan untuk mengiktiraf keputusan Peperiksaan Unified Examination Certificate (UEC) telah menimbulkan banyak kontroversi dan masalah terutama sekali kepada pelajar dan ibu/bapa pelajar yang terlibat. Dan mengambil maklum juga bahawa Negeri Sarawak merupakan negeri pertama di negara ini yang mengiktiraf keputusan peperiksaan UEC sepertimana yang diumumkan oleh YAB Tan Sri Adenan Satem dan sekali gus membolehkan pelajar terlibat meneruskan pengajian mereka dengan tanpa halangan di negeri Sarawak, misalnya di Universiti Malaysia Sarawak. Dan mengambil maklum juga bahawa dengan keengganan Kerajaan Malaysia untuk mengiktiraf keputusan peperiksaan UEC, pelajar yang terlibat terpaksa meneruskan pendidikan mereka di luar negara dan seterusnya bekerja serta menetap di luar negara adalah merupakan kerugian besar negara sebagaimana yang ditekankan oleh YAB Ketua Menteri Sarawak. Dan mengambil maklum juga, bahawa ramai pelajar dan ibu/bapa menganggap bahawa polisi untuk tidak mengiktiraf keputusan peperiksaan UEC ini bersifat diskriminasi di mana pelajar tersebut tidak berpeluang untuk berkhidmat dengan sektor awam di Malaysia. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah mengiktiraf keputusan peperiksaan Unified Examination Certificate bagi membolehkan pelajar yang terlibat meneruskan pendidikan mereka di negara ini serta berkhidmat di sektor awam di negara ini."

**[Menteri Pendidikan ]**

16. PR-1341-U73036

**Datuk Dr. Makin @ Marcus Mojigoh [ Putatan ]** akan mencadangkan:-

Bahawa Dewan ini mengambil maklum bahawa kualiti air Sungai Sembulan adalah amat tercemar dan tidak sihat sama ada bagi hidupan marin mahupun bagi ekosistem marin negara ini. Dan mengambil maklum juga bahawa Sungai Sembulan merupakan rangkaian akhir aliran air dari beberapa siri saluran dan parit daripada beberapa taman perumahan yang berpenduduk padat, sebelum aliran air dilepaskan ke laut. Dan mengambil maklum juga bahawa kebanyakan sistem merawat air kumbahan yang ada di kawasan Bahawa Dewan ini mengambil maklum bahawa kualiti air Sungai Sembulan adalah amat tercemar dan tidak sihat sama ada bagi hidupan marin mahupun bagi ekosistem marin negara ini. Dan mengambil maklum juga bahawa Sungai Sembulan merupakan rangkaian akhir aliran air dari beberapa siri saluran dan parit daripada beberapa taman perumahan yang berpenduduk padat, sebelum aliran air dilepaskan ke laut. Dan mengambil maklum juga bahawa kebanyakan sistem merawat air kumbahan yang ada di kawasan perumahan yang terlibat tidak lagi efisien untuk merawat air kumbahan tersebut sebelum dilepaskan ke saluran-saliran atau parit-parit yang akhirnya

mengalir ke Sungai Sembulan sebelum berakhir ke laut. Dan mengambil maklum juga bahawa sebahagian besar terumbu karang di sekitar perairan negeri Sabah telah musnah disebabkan oleh aktiviti manusia seperti pelepasan air kumbahan yang tidak terawat ke laut. Diketahui bahawa kemusnahan terumbu karang (Coral Bleaching) merupakan satu daripada penyebab utama pemanasan global. Dan mengambil maklum juga bahawa negara Malaysia adalah merupakan salah sebuah negara penyokong dan pendokong gerakan United Nation Environment Programme (UNEP) sesuai dengan deklarasi Global Climate Change Conference, Copenhagen 2009. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah menyediakan satu dana khas bagi tujuan pembinaan loji rawatan air kumbahan di sekitar Sungai Sembulan sebelum air sungai tersebut dilepaskan ke laut bagi menyelamatkan ekosistem laut negara ini."

**[Menteri Sumber Asli dan Alam Sekitar ]**

17. PR-1341-U71877

**Tuan M. Kulasegaran [ Ipoh Barat ]** akan mencadangkan:-

"Bahawa Dewan ini hendaklah mengambil maklum bahawa rang undang-undang harus digubal untuk mengelakkan kes penukaran agama kanak-kanak di bawah umur secara unilateral dengan adanya penguatkuasaan undang-undang yang sewajarnya serta berpadanan dengan nasihat Kabinet pada 2009 iaitu kanak-kanak dikekalkan agama asal mereka sebelum penukaran agama itu berlaku."

**[ Perdana Menteri ]**

18. PR-1341-U73419

**Dr. Tan Seng Giaw [ Kepong ]** akan mencadangkan:-

"Bahawa Dewan akan membincangkan keberkesanan Malaysia mencegah serangan ganas."

**[Menteri Dalam Negeri ]**

19. PR-1341-U71858

**Tuan Fong Kui Lun [ Bukit Bintang ]** akan mencadangkan:-

"Bahawa Kerajaan mempergiatkan usaha untuk menyatupadukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 58 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Malaysia."

**[ Perdana Menteri ]**



20. PR-1341-U71862

**Tuan Fong Kui Lun [ Bukit Bintang ]** akan mencadangkan:-

"Bahawa Kerajaan memulihkan pilihan raya kerajaan tempatan seluruh negara supaya urus tadbir Kerajaan menjadi lebih cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat."

**[ Menteri Kesejahteraan Bandar, Perumahan dan Kerajaan Tempatan ]**

21. PR-1341-U71883

**Dato' Johari bin Abdul [ Sungai Petani ]** akan mencadangkan:-

"Bahawa Dewan ini mengambil maklum serta menyedari bahawa Lembaga Tabung Haji adalah sebuah institusi kewangan yang penuh dengan kejayaan dan amat membanggakan rakyat Malaysia khususnya umat Islam. Institusi ini juga menjadi contoh untuk negara Islam yang lain ikuti. Maka ianya mesti dijaga dengan penuh ketelusan dan amanah. Sebarang penyelewangan wajib diambil tindakan pantas dan menyeluruh dan jika ianya runtuh maka orang yang mesti dipersalahkan ialah Perdana Menteri."

**[ Perdana Menteri ]**

22. PR-1341-U71884

**Dato' Johari bin Abdul [ Sungai Petani ]** akan mencadangkan:-

"Bahawa Dewan ini mengambil maklum bahawa Yayasan Pembangunan Ekonomi Islam Malaysia (YaPEIM) sebuah pertubuhan yang mendapat sokongan umat Islam di Malaysia. Yayasan ini tertegak dengan niat yang penuh suci bagi membangunkan ekonomi umat Islam di samping menolong mereka yang tidak bernasib baik. Oleh sebab itu sokongan berterusan dari individu dan institusi kepada Yayasan ini membuktikan umat Islam negara ini amat prihatin dengan apa yang terjadi dalam masyarakat Islam. Tetapi membiarkan segelintir individu mengambil kesempatan dari kejayaan Yayasan ini hendaklah dikutuk sekeras-kerasnya. Tindakan lembab oleh Menteri dan Kerajaan dalam memantau perjalanan kewangan Yayasan ini juga harus menerima celaan. Sepatutnya semua pihak yang membelanjakan wang YaPEIM bukan pada tempatnya walaupun 'legally right' tetapi tetap 'morally wrong', mesti bertanggung jawab dan meletakkan jawatan atas kadar segera."

**[ Perdana Menteri ]**

23. PR-1341-U71886

**Dato' Johari bin Abdul [ Sungai Petani ]** akan mencadangkan:-

Bahawa Dewan ini mengambil maklum kehidupan rakyat makin dihipit dengan harga barangan yang makin naik dan tidak terkawal akibat pengenalan cukai GST dan pengecilan nilai Ringgit. Semua rakyat di setiap lapisan masyarakat amat merasai keadaan ini. Kerajaan harus bertindak berani seperti yang pernah dilakukan oleh Mantan Perdana Menteri Tun Dr

" Mahathir Mohamad bila negara menghadapi masalah ekonomi yang mencemaskan pada penghujung tahun 90an. Tindakan utama yang mesti diambil sekarang ialah dengan mengurangkan perbelanjaan di Jabatan Perdana Menteri dan Kerajaan mesti mengamalkan sikap berjimat cermat di semua peringkat pentadbiran negara."

**[Menteri Kewangan ]**

24. PR-1341-U71888

**Dato' Johari bin Abdul [ Sungai Petani ]** akan mencadangkan:-

"Bahawa Dewan ini menggesa Kementerian Pendidikan mengambil langkah-langkah segera supaya pelajar-pelajar kita mempunyai pengetahuan dan kebolehan bertutur dalam banyak bahasa terutamanya Bahasa Inggeris, Arab dan Mandarin akan membantu pelajar-pelajar kita bila meninggalkan alam persekolahan dan universiti nanti. Bahasa ini amat luas digunakan dalam kegiatan harian dan perniagaan dalam negeri dan luar negara. Majikan pasti akan mengambil pekerja yang berkebolehan lebih dari satu bahasa, kerana ianya akan menguntungkan majikan dalam banyak aspek. Ketiga-tiga bahasa ini bukanlah sesuatu yang asing bagi kita. Kerajaan harus melihat bagaimana mengintegrasikan pengajaran bahasa-bahasa ini ke dalam sistem pendidikan yang sedia ada. Bayangkan seorang anak Malaysia fasih berbahasa Inggeris, Arab, Mandarin dan dapat mengungkapkan Bahasa Malaysia yang teratur. Sayang sekali apa yang kita sedia ada tidak dimanfaatkan untuk generasi akan datang."

**[Menteri Pendidikan ]**

25. PR-1341-U71890

**Dato' Johari bin Abdul [ Sungai Petani ]** akan mencadangkan:-

"Bahawa Dewan ini mengambil maklum data jumlah pendatang asing yang berdokumen dan tidak berdokumen akan berbeza dari satu agensi kerajaan dengan agensi yang lain. Malah Menteri sendiri menjawab dalam Dewan Parlimen dengan menggunakan perkataan "ini anggaran". Ini bermaksud tiada siapa yang mempunyai data sebenar tentang berapa jumlah Bukan Rakyat Malaysia yang berada di sini. Ini amat membahayakan negara. Kerajaan mesti mengambil tindakan yang berterusan bagi mendaftar mereka yang tidak berdokumen. Tindakan mendaftar dengan mengambil tindakan undang-undang terhadap mereka adalah dua perkara yang berbeza. Yang penting adalah setiap manusia yang berada di negara ini mesti mempunyai dokumen. Tindakan segera mesti diambil dan mestilah berterusan."

**[Menteri Dalam Negeri ]**

26. PR-1341-U72582

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gejala pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu diketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama."

**[ Menteri Kesejahteraan Bandar, Perumahan dan Kerajaan Tempatan ]**

27. PR-1341-U72584

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan."

**[ Menteri Dalam Negeri ]**

28. PR-1341-U72589

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia."

**[Menteri Pendidikan ]**

29. PR-1341-U72617

**Tuan Chua Tian Chang @ Tian Chua [ Batu ]** akan mencadangkan:-

"Bahawa Dewan ini akan menggesa Kerajaan untuk menegakkan prinsip berkecuali sebagaimana yang ditetapkan dalam Non-Alliance Movement (NAM) dan menegaskan bahawa Malaysia tidak akan mengambil bahagian atau menghantar askar untuk menyertai gabungan tentera yang dipimpin Arab Saudi dalam serangan terhadap Yemen, Syria atau mana-mana negara di Timur Tengah."

**[Menteri Luar Negeri ]**

30. PR-1341-U72624

**Tuan Chua Tian Chang @ Tian Chua [ Batu ]** akan mencadangkan:-

"Bahawa Dewan ini menggesa Kerajaan untuk membantu penganggur dengan menyediakan bantuan kewangan secara tunai sebanyak RM1200 sebulan untuk tempoh 3 bulan selepas diberhentikan. Skim ini membolehkan pekerja-pekerja yang menganggur menjamin sara hidup mereka sewaktu mencari pekerjaan baru."

**[Menteri Sumber Manusia ]**

**RISALAT-RISALAT YANG DIBAWA KE DALAM MESYUARAT  
(DEWAN RAKYAT)**

<b><u>TAHUN 2016</u></b>	<b><u>RISALAT/DOKUMEN</u></b>	<b><u>TARIKH DIBENTANGKAN</u></b>
DR.2	Penyata Jawatankuasa Peraturan-Peraturan Mesyuarat Majlis Mesyuarat Dewan Rakyat	6 April 2016
ST.9	Laporan Tahunan dan Penyata Kewangan Suruhanjaya Hak Asasi Manusia Malaysia (SUHAKAM) Bagi Tahun 2015	6 April 2016
ST.11	<b>Akta Cukai Barang dan Perkhidmatan 2014</b> - Perintah Cukai Barang dan Perkhidmatan (Pembekalan Kadar Sifar )(Pindaan) (No.2) 2015 P.U.(A) 290	6 April 2016
ST.12	<b>Akta Cukai Barang dan Perkhidmatan 2014</b> - Perintah Cukai Barang dan Perkhidmatan (Pelepasan)(Pindaan) (No.2) 2015 P.U.(A) 291	6 April 2016
ST.13	<b>Akta Cukai Barang dan Perkhidmatan 2014</b> - Perintah Cukai Barang dan Perkhidmatan (Pembekalan Dikecualikan)(Pindaan) (No.2) 2015 P.U.(A) 292	6 April 2016
ST.16	<b>Akta Kastam 1967</b> - Perintah Duti Kastam (Barang-Barang di Bawah Perjanjian Rangka Kerja Mengenai Kerjasama Ekonomi Komprehensif Antara Kerajaan Negara-Negara Asia Tenggara dan Republik Korea)(Tatanama Tarif Berharmonis ASEAN) 2015 P.U.(A) 286/2015	6 April 2016
ST.17	<b>Akta Kastam 1967</b> - Perintah Duti Kastam (Pindaan)(No.3) 2015 P.U(A) 305/2015	6 April 2016
ST.18	<b>Akta Kastam 1967</b> - Perintah Duti Kastam (Barang-Barang Berasal Dari Negeri-Negeri ASEAN)(Tatanama Tarif Berharmonis ASEAN dan Perjanjian Perdagangan Barang ASEAN) (Pindaan)(No.3) 2015 P.U(A) 306/2015	6 April 2016

<u>TAHUN</u> <u>2016</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
ST.26	<b>Akta Duti Timbal Balas dan Anti lambakan 1993 (Akta 504) dan Akta Kastam 1967 (Akta 235)</b> - Perintah Kastam (Duti Anti-Lambakan) 2016 P.U(A) 11/2016	6 April 2016
ST.27	<b>Akta Duti Timbal Balas dan Anti lambakan 1993 (Akta 504) dan Akta Kastam 1967 (Akta 235)</b> - Perintah Kastam (Duti Anti-Lambakan Sementara) 2016 P.U(A) 12/2016	6 April 2016
ST.29	<b>Akta Kastam 1967</b> - Perintah Duti Kastam (Pindaan) 2016 P.U(A) 19	6 April 2016
ST.30	<b>Akta Kastam 1967</b> - Perintah Duti Kastam (Barang-Barang Berasal Dari Negeri ASEAN)(Tatanama Tarif Berharmonis ASEAN dan Perjanjian Perdagangan Barang ASEAN)(Pindaan)2016 P.U(A) 20	6 April 2016
ST.31	<b>Akta Eksais 1967</b> - Perintah Duti Eksais (Pindaan) 2016 P.U(A) 43	6 April 2016
ST.51	Laporan Tahunan Suruhanjaya Integriti Agensi Penguatkuasaan Bagi Tahun 2015	6 April 2016
ST.54	Laporan Tahunan dan Penyata Kewangan Universiti Malaysia Kelantan (UMK) Bagi Tahun 2014	6 April 2016
ST.55	Laporan Tahunan dan Penyata Kewangan Pusat Perubatan Universiti Malaysia (PPUM) Bagi Tahun 2014	6 April 2016